

逸周書補注

逸周書卷十八

晉孔晁注

江都陳逢衡補注

祭公解第六十

禮記緇衣篇引葉公之顧命曰母以小謀敗大作母以嬖御人疾莊后母以嬖御士疾莊士大夫卿士注葉公楚縣公葉公子高也臨死遺書曰顧命九經古義曰棟案其詞有莊后大夫卿士非葉公之言也此周書祭公謀父之詞祭公將歿而作此篇故謂之顧命其事亦見汲冢古文王伯厚已有是說余特表而

出之

王若曰祖祭公

孔注祭公周公之後昭穆於穆王在祖列

補注竹書紀年穆王十一年王命卿士祭公

次予小子虔虔在位

孔注虔敬

昊天疾威予多時溥愆

孔注溥大也言昊天疾威於我故多是過失

補注昊天疾威當思有以昭事予多時溥愆則非大

臣輔導不可

我聞祖不豫有加于維敬省不弔天降疾病予畏天威公其告于懿德

孔注弔至也言已道不至故天下病王畏守不美懿

美也

盧文弔曰守不美疑訛

補注言子敬省天心不至故天降疾病於我股肱師保之臣子畏天威恐有不測諱言祭公將死也公其告于懿德蓋求遺言訓已之意

祭公拜手稽首曰天子

孔注拜手頭至手稽首頭俯地

謀父疾維不瘳朕身尙在茲朕魂在于天

孔注謀父祭公名我魂在于天言必死也

補注朕身尙在謂當此彌留之際尙奄奄在世茲朕
魂在于天則精氣已散不能久矣盧文弨曰梁云朕
魂在于天昭王之所九字當連作一句讀注似非是
衡案梁解昭王作周昭王而以茲字屬上句不可從
昭王之所勅宅天命

孔注言雖魂在天猶明王之所勉居天下之事也

補注勛卽冒懋也昭王之所勛猶君奭言乃惟時昭
文王迪見冒昭武王惟冒耳昭讀爲釋詁詔亮左右
之詔王指穆王宅天命見康誥宅居也言我身雖死
此心猶不忘王室也

王曰嗚呼公朕皇祖文王烈祖武王度下國作陳周維皇
皇上帝度其心寘之明德

度並入聲

孔注下國謂諸侯也天度其心所能寘明德於其身
也

補注下國猶言小國卽小邦周之謂對上帝言故曰

下國度謀度也作陳周者猶云陳錫哉周也陳布也
卽肇造區夏之謂皇皇美大也上帝天也冥示也帝
度其心故有明德之示以佑啟我後人也

付俾於四方用膺受天命敷文在下

膺舊作應

孔注付與四方受命於天而敷其文德在下土也

補注付如皇天旣付中國民之付付俾於四方謂天
全付予有家也用膺受天命指文武敷布也文謨烈
也此皇祖烈祖上承帝命而式敷下土也如此

我亦維有若文祖周公暨烈祖召公茲申予小子追學於

文武之蔑

孔注言已追學文武之微德此由周召分治之化也

盧文弨曰微德釋蔑
字義舊作微德訛

補注文武之化得周召而益彰故予小子得以追學
於前人也申如申命用休之申蔑如文王蔑德之蔑
蔑小也蓋文武至穆王已五世矣施彥士曰此承上
言我亦惟望有若周公召公其人者引伸予小子仰
文武之末光而不廢家學也

用克龕紹成康之業以將天命用夷居之大商之衆

孔注將行夷平也言大商本其初也

補注龕受也紹述也成康之業在於覲光揚烈將請
也用夷居之大商之衆之猶是也言克撫有殷遺也
爾雅釋言洵龕也邵晉涵曰釋詁云洵信也洵又爲
龕逸周書祭公解云周克龕紹成康之業言能信繼
也

我亦維有若祖祭公之執和周國保乂王家

孔注執謂執其政也

補注施彥士曰此言我所以紹先業乂王家者平日

天王維賴祭公之執和也此稱其已往之功

王曰公稱丕顯之德以予小子揚文武大勲宏成康昭考之烈

孔注稱謂舉行也昭考昭王穆王之父也

補注丕大也顯明也五世之德在予一人則所以仔承者甚鉅此冀祭公訓己以配先德也故下有汝無以一段之告公稱丕顯德以予小子揚文武烈見洛

誥

王曰公無困我哉俾百僚乃心率輔弼予一人

孔注言公當使百官相率輔弼我不然則困我

補注此三言王曰下三言公曰疑聞舉之辭而序書者亂其次也公無困我見洛誥此冀祭公訓百僚以佐已也故下有三公汝念哉至周有常刑之告

祭公拜手稽首曰允乃詔畢桓于黎民殷

孔注殷樂也言信如王告盡治民樂政也乃汝汝王也

公曰天子謀父疾維不瘳敢告天子皇天改大殷之命維文王受之維武王大尅之咸茂厥功

孔注茂美也文王以受命爲美武王以克殷爲美故
曰威也

維天貞文王之董用威亦尙寬壯厥心康受乂之式用休
孔注貞正也董之用威伐崇黎也旣克之而安受治
之其治用美也

補注董督也文王伐密伐崇皆用威之事亦尙寬壯
厥心威而不猛也

亦先王茂綏之心敬恭承之維武王申大命哉厥敵
孔注言武王申文王受命之意而勝殷也

補注戡克也墨子非攻云子必使汝大堪之堪卽戡
公曰天子自三公上下辟于文武文武之子孫大開方封
于下土

孔注辟法也言我上法文武乃大開國旁布于下土
補注辟如徵辟之辟自三公上下辟于文武指四友
十亂謂有此疏附先後之盛故周之子孫得以大開
厥國列土分封也

天之所錫武王時疆土丕維周之基丕維后稷之受命是
永宅之

孔注錫與言天子武王是疆所受是大維周之開基
大維后稷所受命是長居此也

補注言武王奄有天下本于后稷之受命故能弼我
丕丕基而子孫勿替也

維我後嗣旁建宗子丕維周之始并

孔注旁建宗子立爲諸侯言皆始并天子之故也

故疑

作政

補注後嗣指武王以後宗子同姓旁建分封也詩曰
大邦維屏宗子維城始并之謂也盧文弨曰惠云并

卽屏古字通郭注山海經曰并卽屏語有輕重耳

嗚呼天子三公監于夏商之旣敗不則無遺後難至于萬
億年守序終之

孔注言當以夏商爲戒大無後難之道守其序而終

也

道疑
作遺

補注此戒君而兼及臣故旣呼天子而又呼三公以
警之監于夏商之旣敗所謂維彼二國其政不獲也
故不可不監不則無遺後難監前轍則後嗣昌也故
至萬億年猶得終守其序序如繼序思不忘之序

既畢不乃有利宗丕維文王由之

孔注既終之則有利于宗皆由文武之德也

武疑作王

補注畢者終事之辭言能於我周之積功累仁克承其業而無不盡也不乃有利宗者言於是有利宗也利宗謂有益周室由用也言我周承先啟後總萃於文王一人尤當敬守其法也

公曰嗚呼天子我不則寅哉寅哉

孔注寅敬也不則則也

補注不亦丕字如不顯不承之不注非是

汝無以戾反罪疾喪時二王大功

喪去聲

孔注戾反罪疾謂己所行時是二王文武

汝無以嬖御固莊后

緇衣固作疾

孔注嬖御寵妾也莊正也

楊本有固疾也句而無莊正也三字

補注固有禁錮之義如漢武陳后長門永巷之謂緇

衣御下有人字注云嬖御人愛妾也莊后適夫人齊

莊得禮者

汝無以小謀敗大作

孔注小謀謂不法先王也大作大事也